

Forskrift om politivedtekt, Hareid kommune, Møre og Romsdal.

Kapitteloversikt:

[Kapittel I. Allmenne føresegner \(§§ 1 - 2\)](#)

[Kapittel II. Orden på offentlig stad \(§§ 3 - 5\)](#)

[Kapittel III. Sikring av ferdsla \(§§ 6 - 14\)](#)

[Kapittel IV. Reinhold på offentlig stad \(§§ 15 - 17\)](#)

[Kapittel V. Hindre tilgrising \(§§ 18 - 19\)](#)

[Kapittel VI. Offentlege anlegg \(§20\)](#)

[Kapittel VII. Dyr \(§§ 21 - 24\)](#)

[Kapittel VIII. Arrangement på offentlig stad m.v. \(§§ 25 - 26\)](#)

[Kapittel IX. Born \(§27\)](#)

[Kapittel X. Ymse føresegner \(§§ 28 - 30\)](#)

Kapittel I. Allmenne føresegner

§ 1. Offentleg stad

Med offentlig stad er i denne vedtekta meint gate, veg, her medrekna fortau, stig, park, torg e.l., plass, bru, bryggje, kai, strand, anlegg eller annan stad der det er allmenn ferdsle eller som er bestemt for allmenn ferdsle.

§ 2. Festar, brukar, leigar eller styrar av hus eller grunn

Plikt som er lagd på eigar av hus eller grunn, kviler også på den som festar, brukar, leiger eller styrer hus eller grunn.

Kapittel II. Orden på offentlig stad

§ 3. Ro og orden på offentlig stad

På eller like attmed offentlig stad må ingen vere med i oppstyr, samanstimling, larm eller bråk som skiplar den allmenne orden eller ferdsel.

Når mange menneske samlar seg nær inngang til forsamlingslokale, sports plass, utsalsstad, stoppeplass e.l., skal dei stå i kø og elles rette seg etter dei pålegg som politiet eller arrangøren gjev for å halde oppe den allmenne orden eller for å regulere ferdsla.

§ 4. Song og musikk, reklame m.m.

Den som på eller ut mot offentleg stad vil føre fram song eller musikk, skipa til framsyning eller gjere bruk av høgtalar, må på førehand gje melding til politiet.

Det same gjeld den som på eller nær offentleg stad ynskjer å dele ut eller spreie opprop, lysingar, reklame e.l., eller bruke gåande, køyrande eller flygande reklame.

§ 5. Farleg eller skremmande verksemd

På, ut over eller like attmed offentleg stad er det forbode:

1. å skyte med gevær eller anna skytevåpen, medrekna paintball, softgun, boge, sprettert ol.
2. å brenne av krut, fyrverk eller sprengstoff utan at politiet har gjeve løyve. Slikt løyve er ikkje påkrevd for godkjent fyrverkeri som skal nyttast i tida 31. desember frå kl. 18.00 til 1. januar kl. 02.00.
3. å kaste eller sleppe stein, snøball eller anna som kan vere til skade eller ulempe for dei som ferdast der.

Det er forbode å bere ladd skytevåpen på offentleg stad.

Kapittel III. Sikring av ferdsla

§ 6. Hindringar

På eller ut over offentleg stad er det forbode å setje eller hengje noko som kan vere til hinder eller ulempe for ferdsla.

Markiser eller anna som heng utover fortau skal vere festa så høgt at underkanten minst er 2,5 m over bakken.

§ 7. Sport, leik

Politiet kan sette forbod mot aking og andre former for sport, leik eller spel på bestemt offentleg stad der dette er påkravd av omsyn til ferdsla eller den allmenne orden.

§ 8. Sperring av fortau m.v.

Krev byggjearbeid e.l. at gate, veg eller annan offentleg stad vert heilt eller delvis sperra for ei avgrensa tid, lyt ein på førehand melde frå til politiet. Politiet kan setje nærare vilkår.

§ 9. Sprengingsarbeid

Sprenging på eller like attmed offentleg stad skal meldast til politiet på førehand. Politiet kan krevje særlege tryggingstiltak.

§ 10. Diverse arbeid

Reising, riving eller reparasjon av bygning, graving eller anna arbeid på eller ut mot offentlig stad der det kan bli fare for ferdsla, skal på førehand meldast til politiet. Politiet kan fastsette korleis arbeidsstaden skal sperrast og krevje andre tryggingstiltak til vern for publikum.

§ 11. Vedlikehald av bygning m.v.

Ved vedlikehald av bygningar m.v. på eller ut mot offentlig stad pliktar den ansvarlege for arbeidet å setje opp avvisarar som gjer det tydeleg at det er farleg eller til ulempe å ferdist der.

§ 12. Fare for takras

Når det er fare for at snø eller is kan falle ned frå hustak mot offentlig stad, skal eigaren straks sette opp avvisarar som gjer det tydeleg at det er farleg å ferdist der, og snarast syte for at taket blir rydda.

§ 13. Fjerning av sperrar

Sperringar, avvisarar, stigar e.l. må takast bort når arbeid som nemnt i [§§ 9, 10 og 11](#) er gjort eller når faren som er nemnt i [§ 12](#) ikkje lenger er til stades.

§ 14. Ferdsle på frose vatn eller sjø

Politiet kan av tryggingssgrunnar sette forbod mot eller gje regulerande føresegner for ferdsle på vatn eller sjø som er frose.

Kapittel IV. Reinhald på offentlig stad

§ 15. Fortau m.v.

Eigar av hus eller grunn mot offentlig stad pliktar å gjere reine lys- og luftegraver som er knyta til eigedomen.

Reinhaldet skal gjerast slik at det vert til minst mogeleg ulempe.

Oppsop e.l. må ikkje tømast eller sopast opp i sluk for overvatn.

§ 16. Rydding av snø etter takras

Eigar av hus eller grunn mot offentlig stad pliktar å rydde fortauet utanfor eigedomen for snø og is etter takras.

§ 17. Avløp for vatn

Eigar av hus eller grunn mot offentlig stad skal sørge for at avløp for vatn i fortau, rennestein, grøft e.l. vert halde ope.

Kapittel V. Hindre tilgrising

§ 18. Hindre tilgrising o.l.

På, ut over eller like attmed offentlig stad er det forbode:

1. å kaste glas, flasker, spikar, papir, fruktskal eller anna avfall,
2. å grise til med måling, tusj, sprayprodukt e.l. på noko overflate mot offentlig stad, under dette på eller ved bygning, gate, veg, park, anlegg, innretingar og framkomstmiddel.
3. å hengje opp kunngjeringar, plakatar, e.l. utan at politiet har tillate dette.

Dette gjeld likevel ikkje oppslag på tavler e.l. som kommunen har godkjent til slikt bruk, eller oppslag på eigedom dersom eigaren gjev løyve.

Det er forbode å rive, skade eller skjemme oppslag som er lovleg sett opp.

Når oppslag ikkje lenger er aktuelle, skal dei fjernast av den som hadde ansvaret for å sette dei opp.

4. å urinere **utandørs i tettbygd strøk eller der det kan virke sjenerande på andre**

§ 19. Avfall

Den som driv med sal frå portrom, kiosk e.l., eller som driv anna liknande næringsverksemd på eller ut mot offentlig stad, skal syte for at området ikkje vert skjemt eller skitna til av verksemda, og pliktar å syte for at det blir sett opp mange nok korgar for papir og avfall. Den næringsdrivande skal elles syte for at papir, avfall og anna materiell som følgjer av salsaktiviteten, jamleg vert fjerna.

Den som arrangerer tilstelling på offentlig stad, skal syte for at papir og anna avfall blir fjerna etter arrangementet.

Kapittel VI. Offentlege anlegg

§ 20. Kyrkjegard

På kyrkjegard er det forbode å sykle, ake eller å drive sport, leik eller anna som ikkje sømer seg der.

Det er forbode å trengje seg inn på kyrkjegard når den er stengd for besøk, og å uroe seremonien i samband med gravferd (jordfesting).

Kapittel VII. Dyr

§ 21. Husdyr m.m.

Det er forbode å la husdyr gå laus på eller like attmed offentlig stad utan forsvarleg tilsyn.

Sirkusdyr eller ville dyr må ikkje ferast på offentlig stad utan løyve frå politiet.

Kapittel VIII. Arrangement på offentlig stad m.v.

§ 22. Meldeplikt for arrangement på offentlig stad

Den som på offentlig stad vil lage til arrangement som hovudsakleg er av underhaldande, kunstnerisk, selskapeleg eller kommersielt slag, som har ein storleik som openbert vil føre til behov for omfattande reguleringar av ferdsla eller vakthald, må melde frå om dette innan ein frist som politiet set. [Politilova § 11](#) gjeld tilsvarande.

§ 23. Meldeplikt for allment tilgjengelege arrangement utanfor offentlig stad m.m.

Den som vil lage til eit arrangement som er allment tilgjengeleg, må sende melding i god tid til politiet. Dette skal gjerast sjølv om arrangementet ikkje går føre seg på offentlig stad, når det er truleg at det vert naudsynt med polititilsyn for å sikre ro og orden eller avviking av trafikken på grunn av storleiken på eller karakteren av arrangementet.

Plikt til å melde frå gjeld óg samkome med dans eller anna tilstelling som hovudsakleg er av selskapeleg eller underhaldande art for medlemmer av ei foreining eller liknande samanslutning. [Politilova § 11](#) gjeld tilsvarande.

Kapittel IX. Born

§ 24. Offentleg dans e.l.

Born under 15 år har ikkje tilgjenge til offentlig dans eller liknande allment tilgjengeleg tilstelling utan at dei er saman med foreldre eller andre føresette.

Kapittel X. Ymse føresegner

§ 25. Forsøming av plikt

Forsømer nokon å utføre det vedkomande har plikt til etter vedtekta eller etter pålegg gjeve med heimel i vedtekta, kan politiet på venge av vedkomande setje dette i verk. Den som har forsømt pliktene må dekkje utgiftene.

§ 26. Straff

Brot på vedtekta eller pålegg gjeve i medhald av vedtekta, vert straffa etter [politilova § 30](#) nr. 4, om ikkje tilhøvet kjem inn under strengare straffepåbod.

§ 27. Iverksetjing

Denne vedtekta tek til å gjelde 1 måned etter at ho er stadfest av Justis- og politidepartementet. [Frå same tid fell føresegn av 2. februar 2000 nr. 139 om politivedtekt for Hareid kommune, Møre og Romsdal bort.](#)